

Minister di Cultura Otmar Oduber y Departamento di Cultura

Orguyoso di e ganadonan di Gang di Arte 2014



DEN cuadro di e Competencia Hubenil Gang di Arte 2014, Minister di Turismo, Transporte, Sector Primario y Cultura conhuntamente cu Departamento di Cultura (DCA) ta desea e grupo ganado hopi exito representando nos isla den exterior.

Diabierna e grupo 'Next Level' ganado di Gang di Arte (GdA) 2014 a sali pa Corsou, unda nan lo representa Aruba na un nivel internacional den e Dutch Caribbean Youth Art Festival cu lo tuma luga den Teatro Luna Blou y la Tentashon.

'Next Level - powered by Popcorn Dancers' a gana na Aruba den e competencia cu nan presentacion titula "Continua cu bo studio", disciplina Artistico Teatro-Baile, participantenan ta Ashmira Garió, Jeanissa Maduro, Maria Webb, Gabriela Croes, Tyrone Chirino, Steven Mendez, Moises Quandt y Osbaldo Correa. Hunto cu nan a biaha Jhon Freddy Montoya líder di e proyecto Gang di Arte y coordinado di seccion di implementacion na Departamento di Cultura Aruba(DCA).

Nan a duna un presentacion di baile combina cu teatro cu e tema evolucion di ciencia y tecnologia den un ambiente escolar na unda bo por a mira e rol di e maestro di scol cu tabata indica cada accion di e cambionan di tecnologia den nos tempo. Oswaldo Correa a laga sa cu e grupo semper ta cla pa bay next level. Nan ta bay cu hopi entusiasmo, energia y creatividad pa pone drama na Corsou. GdA ta un proyecto di Departamento di Cultura

Aruba y realisa hunto cu Telearuba.

Hunto cu nan lo participa na e Dutch Caribbean Youth Art Festival, tanto Hulanda, Surnam, Sint Maarten, Boneiro, Corsou y Aruba. For di dia 1 di augustus te cu dia 9 di augustus 2014 lo tin un programa interesante den forma di intercambio caminda tur e hobennan lo participa y na final lo mester crea un otro presentacion pa presenta esaki dilanti e publico di Corsou.

Ministerio di Cultura y Departamento di Cultura Aruba ta desea nos representante, e grupo Next Level tur clase di exito y ta convenci cu nan lo haci un bon trabou.